

四庫全書

集部

欽定四庫全書

白氏長慶集卷二十二

唐白居易撰

格詩雜體

凡六十首

和微之詩二十三首

并序

微之又以近作二十三首寄來命僕繼和其閒
瘵絮四百字車斜二十篇者流皆韻劇辭殫
瓌奇怪譎又題云奉煩只此一度乞不見辭
若欲定霸取威置僕於窮地

耳大凡依次用韻韻同而意殊約體為文文成而理勝此足下素所長者僕何有焉今足下果用所長過蒙見窘然敵則氣作急則計生四十二章麾掃並畢不知大敵以為如何夫劖石破山先觀饒跡發矢中的兼聽絃聲以足下來章惟求相困故老僕報語不覺大誇况曩者唱酬近來因繼已十六卷凡千餘首矣其為敵也當今不見其為多也從古未聞所謂天下英雄唯使君與操耳戲及此者亦欲三千里外一破愁顏勿示他人以

取笑誚樂天白

和晨霞

此後在上都作

君歌仙氏真我歌慈氏真慈氏發真念念此閻浮人左
命大迦葉右名桓提因千萬化菩薩百億諸鬼神上自
非相頂下及風水輪胎卵濕化類蠢蠢難具陳弘願在
救拔大悲忘辛勤無論善不善豈間冤與親抉開生盲
眼擺去煩惱塵燭以智慧日洒之甘露津千界一時度
萬法無與隣借問晨霞子何如朝玉宸

和送劉道士遊天台

聞君夢遊仙輕舉超世霧握持尊皇節統衛吏兵軍靈
旗星月象天衣龍鳳紋佩服交帶籙諷吟藥珠文闔宮
縹緲閒釣樂依稀聞齋心謁西母瞑拜朝東君煙霏子
晉裾霞爛麻姑裙倏忽別真侶悵望隨歸雲人生同大
夢夢與覺誰分況此夢中夢悠哉何足云假如金闕頂
設使銀河瀆既未出三界猶應在五蘊飲嚙日月精茹
嚼沆瀣芬尚是色香味六塵之所熏仙中有天仙首出

夢幻羣慈光一照燭真法相網緼不知萬齡暮不見三
光曛一性自了了萬緣徒紛紛苦海不能漂劫火不能
焚此是竺乾教先生垂典墳

和櫛沐寄道友

櫛沐事朝謁中門初動關盛服去尚早假寐須臾間鐘
聲發東寺夜色藏南山停驂待五漏人馬同時閒高星
粲金粟落月沈玉環出門向關路坦坦無阻艱始出里
北閑稍轉市西闌晨燭照朝服紫爛復朱殷由來朝廷

金史卷之二十一
卷二十一
士一入多不還因循擲白日積漸凋朱顏青雲已難致
碧落安能攀但且知止足尚可銷憂患

和祝蒼華

蒼華髮
神名

日居復月諸環迴照下土使我玄雲髮化為素絲縷稟
質本羸劣養生仍莽鹵痛飲困連宵悲吟飢過午遂令
頭上髮種種無尺五根稀比黍苗梢細同釵股豈是乏
膏沐非關櫛風雨最為悲傷多心焦衰落苦餘者能有
幾落者不可數禿似鵲填河墮如烏解羽蒼華何用祝

苦辭亦休吐正如剃頭僧豈要巾冠主

和我年三首

我年五十七榮名得幾許甲乙三道科蘇杭兩州主才能本淺薄心力虛勞苦可能隨衆人終老於塵土

我年五十七歸去誠已遲歷官十五政數若珠纍纍野萍始賓薦場苗初紮維因讀管蕭書竊慕大有為及遭榮遇來乃覺才力羸黃紙詔頻草朱輪車載脂妻孥及僕使皆免寒與飢省躬私自愧知我者微之永懷山陰

守未遂嵩陽期如何坐留滯頭白江之湄

我年五十七榮名得非少報國竟何如謀身猶未了昔
嘗速官謗恩大而懲小一點鶴辭軒七年魚在沼將枯
鱗再躍經鍛翮重矯白日上昭昭青雲高渺渺平生頗
同病老大宜相曉紫綬足可榮白頭不為天風懷慕箕
穎晚節期松篠何當闕下來同拜陳情表

和三月三十日四十韻

送春君何在君在山陰署憶我蘇杭時春遊亦多處為

君歌往事豈敢辭勞慮莫怪言語狂須知酬答遽江南
臘月半水凍凝如瘕寒景尚蒼茫和風已吹噓女牆城
似竈鴈齒橋如鋸魚尾上齋淪草芽生沮洳律遲太簇
管日緩羲和馭布澤木龍催迎春土牛助雨師習習灑
雲將飄飄翥四野萬里晴千山一時曙杭土麗且康蘇
民富而庶善惡有懲勸剛柔無吐茹兩衙少辭牒四境
稀書疏俗以勞俸安政因閒暇著仙亭日登眺虎丘時
游豫

望仙亭在杭
虎丘寺在蘇

尋幽駐旌軒選勝迴賓御舟移溪鳥

避樂作林援觀池古莫耶沈石竒羅剎踞

劍池在蘇州羅剎石在杭

州水苗泥易耨畲粟灰難鋤紫蕨抽出畦白蓮埋在淤

菱花紅帶黯溫葉黃含菸

楚辭云葉菸色而祝黃

鏡動波颭菱雪

迴風旋絮手經攀桂馥齒為嘗梅楚坐併船腳欹行多

馬蹄踰聖賢清濁醉水陸鮮肥飫魚鱠芥醬調水葵鹽

豉絮

救慮反

雖微五袴詠幸免兆人詛但令樂不荒何必

遊無倨吳苑僕尋罷越城公尚據舊遊幾客存新宴誰

人與莫空文舉酒強下何曾飭江上易優游城中多毀

譽分應當自盡事勿求人恕我既無子孫君仍畢婚娶
久為雲雨別終擬江湖去范蠡有扁舟陶潛有籃輿兩
心苦相憶兩口遙相語最恨七年春春來各一處

和寄樂天

賢愚類相交人情之大率然自古今來幾人號膠漆近
聞屈指數元某與白乙旁愛及弟兄中權避家室松筠
與金石未足喻堅密在車如輪轅在身如肘腋又如風
雲會天使相名匹不似勢利交有名而無實頃我在杭

歲值君之越日望愁來儀遲宴惜流景疾坐耀黃金帶
酌醢蘋玉質酣歌口不停狂舞衣相拂平生賞心事施
展十未一會笑始啞啞離嗟乃唧唧餞筵纔收拾征棹
遽排比後恨苦絲絲前歡何卒卒居人色慘淡行子心
紆鬱風袂去時揮雲帆望中失宿醒和別思目眩心忽
忽病魂黯然銷老淚淒其出別君只如昨芳歲換六七
俱是官家身後期難自必

籍田賦云難
望歲而自必

和寄問劉白

時夢得與樂
天方舟西上

正與劉夢得醉笑大開口適值此詩來歡喜君知否遂
令高卷幕兼遣重添酒起望會稽雲東南一回首愛君
金玉句舉世誰人有功用隨日新資材本天授吟哦不
能散自午將及酉遂留夢得眠匡牀宿東牖

和新樓北園偶集從孫公度周巡官韓秀才
盧秀才范處士小飲鄭侍御判官周劉二
從事皆先歸

聞君新樓宴下對北園花主人既賢豪賓客皆才華初

筵日未高中飲景已斜天地為幕席富貴如泥沙嵇劉
陶阮徒不足置齒牙臥甕鄙畢卓落帽嗤孟嘉芳草供
枕藉亂鶯助諠譁醉鄉得道路狂海無津涯一歲春又
盡百年期不賒同醉君勿辭獨醒古所嗟銷愁若沃雪
破悶如割瓜稱觴起為壽此樂無以加歌聲凝貫珠舞
袖飄亂麻相公謂四座今日非自誇有奴善吹笙有婢
彈琵琶十指纖若笋雙鬟繫如鴉履舄起交雜盃盤散
紛拏歸去勿擁遏倒載逃難遮明日宴東武後日遊若

耶豈獨相公樂謳歌千萬家

和除夜作

君賦此詩夜窮陰歲之餘我和此詩日微和春之初老
知顏狀改病覺肢體虛頭上毛髮短口中牙齒疎一落
老病界難逃生死墟況此促促世與君多索居君在浙
江東榮駕方伯輿我在魏闕下謬乘大夫車妻孥常各
飽奴婢亦盈廬唯是利人事比君全不如我統十郎官
君領百吏胥我掌四曹局君管十鄉閭君為父母君大

惠在資儲我為刀筆吏小惡乃誅鋤君提七郡籍我按
三尺書俱已佩金印嘗同趨玉除外寵信非薄中懷何
不攄恩光未報答日月空居諸磊落嘗許君跼促應笑
予所以自知分欲先歌歸歎

和知非

因君知非問詮較天下事第一莫若禪第二無如醉禪
能泯人我醉可忘榮悴與君次第言為我少留意儒教
重禮法道家養神氣重禮足滋彰養神多避忌不如學

神定中有甚深味曠廓了如空澄凝勝於睡屏除默默
念銷盡悠悠思春無傷春心秋無感秋淚坐成真諦樂
如受空王賜既得脫塵勞兼應離慙愧除禪其次醉此
說非無謂一酌機即忘三盃性咸遂逐臣去室婦降虜
敗軍帥思苦膏火煎憂深局鑠祕須憑百杯沃莫惜千
金費便似罩中魚脫飛生兩翅勸君雖老大逢酒莫迴
避不然即學禪兩途同一致

和曉望

休吟稽山曉聽詠秦城旦鳴雞初有聲宿鳥猶未散丁
丁漏向盡鼕鼕鼓過半南山青沈沈東方白漫漫街心
若流水城角如斷岸星河稍隅落宮闕方輪煥朝車雷
四合騎火星一貫赫奕冠蓋盛熒煌朱紫爛沙堤亘蟄

池

子城東北低下處舊號蝦蟇池

市路遶龍斷白日忽照耀紅塵紛散

亂貴教過客避榮任行人看祥煙滿虛空春色無邊畔
鴈行候晷刻龍尾登霄漢臺殿暖宜攀風光晴可翫草
鋪地茵褥雲卷天幃幔駕雜佩鏘鏘花遶衣粲粲何言

終日樂獨起臨風歎歎我同心人一別春七換相望山
隔礙欲去官羈絆何日到江東超然似張翰

和李勢女

減一分太短增一分太長不朱面若花不粉肌如霜色
為天下豔心乃女中郎自言重不幸家破身未亡人各
有一死此死職所當忍將先人體與主為疣瘡妾死主
意快從此兩無妨願信赤心語速即白刃光南郡忽感
激却立捨鋒鋌撫背稱阿姉

與姊同歸我如歸鄉竟以祖似切

恩信待豈止猜妬忘由來几上肉不足揮干將南郡死
已久骨枯墓蒼蒼願於墓上頭立石鐫此章勸誡天下
婦不令陰勝陽

和酬鄭侍御東陽春悶放懷追越遊見寄

君得嘉魚置賓席樂如南有嘉魚時勁氣森爽竹竿疎
妍文煥爛芙蓉披載筆在幕名已重補袞於朝官尚卑
一緘疏入掩谷永三都賦成排左思自言拜辭主人後
離心蕩颺風前旗東南門館別經歲春眼悵望秋心悲

已上敘
嘉魚

昨日嘉魚來訪我方駕同出何所之樂遊原頭
春尚早百舌新語聲裊裊日趨花忙向南拆風催柳急
從東吹流年愀恍未饒我美景鮮妍來為誰紅塵三條
界阡陌碧草千里鋪郊畿餘霞斷時綺幅裂斜雲展處
羅文紕暮鐘遠近聲互動暝鳥高下飛追隨酒酣將歸
未能去悵然迴望天四垂生何足養嵇著論途何足泣
楊漣湏胡不花下伴春醉滿酌綠酒聽黃鸝嘉魚點頭
時一歎聽我此言不知疲語終興盡各分散東西軒騎

分逶迤此詩勿遣閒人見見恐與他為笑資白首舊寮
知我者憑君一詠向周師

周判官師範蘇杭舊
判官去範字叶韻

和自勸二首

稀稀疎疎遶籬竹窄窄狹狹向陽屋屋中有一曝背翁
委置形骸如土木日暮半爐麩炭火夜深一盞紗籠燭
不知有益及民無二十年來食官祿就暖移盤簷下食
防寒擁被帷中宿秋官月俸八九萬豈徒遣爾身溫足
勤操丹筆念黃沙莫使飢寒囚滯獄

急景凋年急於水念此攬衣中夜起門無宿客共誰言
煖酒挑燈對妻子自飲數杯妻一盞餘酌分張與兒女
微酣靜坐未能眠風霰蕭蕭打窓紙自問有何才與術
入為丞郎出刺史爭如壽命短復長豈得營營心不止
請看韋孔與錢崔半月之間四人死

韋中書孔京兆錢
尚書崔華州十五

日閒相
次而逝

和雨中花

真宰倒持生殺柄閒物命長人短命松枝上鶴著下龜

千年不死仍無病人生不得似龜鶴少去老來同旦暝
何異花開旦暝閒未落仍遭風雨橫草得經年菜連月
唯花不與多時節一年三百六十日花能幾日供攀折
桃李無言難自訴黃鸝解語憑君說鸞雖為說不分明
葉底枝頭謾饒舌

和晨興因報問龜兒

冬旦寒慘澹雲日無晶輝當此歲暮感見君晨興詩君
詩亦多苦苦在兄遠離我苦不在遠纏綿肝與脾西院

病孀婦後牀孤姪兒黃昏一慟後夜半斗起時病眠兩
行淚悲鬢萬莖絲咽絕五臟脈瘦消百骸脂雙目失一
目四肢斷兩肢不如溘然逝安用半活為誰謂荼蘼苦
荼蘼甘如飴誰謂湯火熱湯火冷如澌前時君寄詩憂
念問阿龜喉燥聲氣窒經年無報辭及覩晨興句未吟
先涕垂因茲漣洳際一吐心中悲茫茫四海間此苦唯
君知我去四千里使我告訴誰仰頭向青天但見鴈南
飛憑鴈寄一語為我達微之弦絕有續膠樹斬可接枝

唯我中腸斷應無連得期

和朝回與王鍊師遊南山下

藹藹春景餘我我夏雲初蹀躞退朝騎飄飄隨風裾晨
從四丞相入拜白玉除暮與一道士出尋青谿居吏隱
本齊致朝野孰云殊道在有中適機忘無外虞但愧煙
霄上鸞鳳為吾徒又慙雲林閒鷗鶴不我疎坐傾數杯
酒臥枕一卷書興酣頭兀兀睡覺心于于以此送日月
問師為何如

和嘗新酒

空腹嘗新酒偶成卯時醉醉來擁褐裘直至齋時睡
酣不語笑真寢無夢寐殆欲忘形骸詎知屬天地醒餘
和未散起坐澹無事舉臂一欠伸引琴彈秋思

和順之琴者

陰陰花院月耿耿蘭房燭中有弄琴人聲貌俱如玉清
泠石泉引雅澹風松曲遂使君子心不愛凡絲竹

感舊寫真

李放寫我真寫來二十載莫問真何如畫亦銷光彩朱
顏與玄鬢日夜改復改無嗟貌遽非且喜身猶在

授太子賓客歸洛

自此後
東都作

南省去拂衣東都來掩扉病將老齊至心與身同歸白
首外緣少紅塵前事非懷哉紫芝叟千載心相依

秋池二首

身閒無所為心閒無所思况當故園夜復此新秋池岸
闌鳥棲後橋明月出時菱風香散漫桂露光參差靜境

多獨得幽懷竟誰知悠然心中語自問來何遲

朝衣薄且健晚簟清仍滑社近燕影稀雨餘蟬聲歇閒
中得詩境此境幽難說露荷珠自傾風竹玉相戛誰能
一同宿共翫新秋月暑退涼早歸池邊好時節

中隱

大隱住朝市小隱入丘樊丘樊太冷落朝市太囂諠不
如作中隱隱在留司官似出復似處非忙亦非閒不勞
心與力又免飢與寒終歲無公事隨月有俸錢君若好

登臨城南有秋山君若愛遊蕩城東有春園君若欲一
醉時出赴賓筵洛中多君子可以恣歡言君若欲高臥
但自深掩關亦無車馬客造次到門前人生處一世其
道難兩全賤即苦凍餒貴則多憂患唯此中隱士致身
吉且安窮通與豐約正在四者閒

問秋光

殷卿領北鎮崔尹開南幕外事信為榮中懷未必樂何
如不才者兀兀無所作不引窓下琴即舉池上酌淡交

唯對水老伴無如鶴自適頗從容旁觀誠落身心轉
恬泰煙景彌淡泊回首語秋光東來應不錯

引泉

一為止足限二為衰疾牽
邴罷不因事陶歸非待年
歸來嵩洛下閉戶何翛然
靜掃林下地閒疏池畔泉
伊流狹似帶洛石大如拳
誰教明月下為我聲濺濺
竟夕舟中坐有時橋上眠
何用施屏障水竹繞牀前

知足吟

和崔十八
未貧作

不種一隴田倉中有餘粟不採一株桑箱中有餘服官
閒離憂責身泰無羈束中人百戶稅賓客一年祿樽中
不乏酒籬下仍多菊是物皆有餘非心無所欲吟君未
貧作因歌知足曲自問此時心不足何時足

酬集賢劉郎中對月見寄兼懷元浙東

月在洛陽天天高淨如水下有白頭人擘衣中夜起思
遠鏡亭上光深書殿裏眇然三處心相去各千里

太湖石

遠望老差我近觀怪嶽峯纔高八九尺勢若千萬尋嵌
空華陽洞重疊屏山岑邈矣仙掌迴呀然劒門深形質
冠今古氣色通晴陰未秋已瑟瑟欲雨先沈沈天姿信
為異時用非所任磨刀不如礪擣帛不如砧何乃主人
意重之如萬金豈伊造物者獨能知我心

偶作二首

擾擾貪生人幾何不天閑遑遑愛名人幾何能貴達伊
余信多幸拖紫垂白髮身為三品官年已五十八筋骸

雖早衰尚未苦羸假資產雖不豐亦不甚貧竭登山力
猶在遇酒興時發無事日月長不羈天地濶安身有處
所適意無時節解帶松下風抱琴池上月人間所重者
相印將軍鉞謀慮繫安危威權主生殺焦心一身苦災
手旁人熱未必方寸閒得如吾快活

日出起盥櫛振衣入道場寂然無他念但對一爐香日
高始就食食亦非膏粱精粗隨所有亦足飽充腸日午
脫巾簪燕息窓下牀清風颭然至臥可致羲皇日西引

杖屨散步遊林塘或飲茶一盞或吟詩一章日入多不
食有時唯命觴何以送閒夜一曲秋霓裳一日分五時
作息率有常自喜老後健不嫌閒中忙是非一以貫身
世交相忘若問此何許此是無何鄉

葺池上舊亭

池月夜淒涼池風曉蕭颯欲入池上冬先葺池中閣向
暖窓戶開迎寒簾幕合苔封舊瓦木水照新朱蠟軟火
深土爐香醪小瓷榼中有獨宿翁一燈對一榻

崔十八新池

愛君新小池池色無人知
見底月明夜無波風定時
忽看不似水一泊稀疏璃

翫止水

動者樂流水靜者樂止水利物不如流鑒形不如止淒
清早霜降淅瀝微風起中面紅葉開四隅綠萍委廣狹
八九丈灣環有涯涘淺深三四尺洞徹無表裏淨分鶴
翹足澄見魚掉尾迎眸洗眼塵隔霄蕩心滓定將禪不

別明與誠相似清能律貪夫淡可交君子豈唯空狎翫
亦取相倫擬欲識靜者心心源只如此

聞崔十八宿于新昌弊宅時予亦宿崔家依仁
新亭一宵偶同兩興暗合因而成詠聊以寫

懷

陋巷掩弊廬高居敞華屋新昌七株松依仁萬莖竹松
前月臺白竹下風池綠君向我齋眠我在君亭宿平生
有微尚彼此多幽獨何必求主人兩心聊自足

日長

日長晝加餐夜短朝餘睡春來寢食閒雖老猶有味林
塘得芳景園曲生幽致愛水多棹舟惜花不掃地幸無
眼下病且向樽前醉身外何足言人閒本無事

三月三十日作

今朝三月盡寂寞春事畢黃鳥漸無聲朱櫻新結實臨
風獨長歎此歎意非一半百過九年豔陽殘一日隨年
減歡笑逐日添衰疾且遣花下歌送此盃中物

慵不能

架上非無書眼慵不能看匣中亦有琴手慵不能彈腰
慵不能帶頭慵不能冠午後恣情寢午時隨事餐一餐
終日飽一寢至夜安飢寒亦閒事况乃不飢寒

晨興

宿鳥動前林晨光上東屋銅爐添早香紗籠滅殘燭頭
醒風稍愈眼飽睡初足起坐兀無思叩齒三十六何以
解宿齋一杯雲母粥

朝課

平甃白石渠靜掃青苔院池上好風來新荷大如扇小
亭中何有素琴對黃卷藥珠諷數篇秋思彈一遍從容
朝課畢方與客相見

天竺寺七葉堂避暑

鬱鬱復鬱鬱伏熱何時畢行入七葉堂煩暑隨步失簷
雨稍霏微窓風正蕭瑟清宵一覺睡可以銷百疾

香山寺石樓潭夜浴

炎光晝方熾暑氣宵彌毒搖扇風甚微褰裳汗霏霖起
向月中行來就潭中浴平石為浴牀窪石為浴斛綃巾
薄露頂草屨輕乘足清涼詠而歸歸上石樓宿

嗟髮落

朝亦嗟髮落暮亦嗟髮落落盡誠可嗟盡來亦不惡既
不勞洗沐又不勞梳掠最宜濕暑天頭輕無髻縛脫置
垢巾幘解去塵纓絡銀瓶貯寒泉當頂傾一勺有如醍
醐灌坐受清涼樂因悟自在僧亦資於剝削

安穩眠

家雖日漸貧猶未苦飢凍身雖日漸老幸無急病痛眼
逢閑處合心向閒時用既得安穩眠亦無顛倒夢

池上夜境

晴空星月落池塘澄鮮淨綠表裏光露簾清瑩迎夜滑
風襟蕭洒先秋涼無人驚處野禽下新睡覺時幽草香
但問塵埃能去否濯纓何必向滄浪

書紳

仕有職役勞農有畎畝勤優哉分司叟心力無苦辛歲
晚頭又白自問何欣欣新酒始開甕舊穀猶滿囷吾嘗
靜自思往往夜達晨何以送吾老何以安吾貧歲計莫
如穀飽則不干人日計莫如醉醉則兼忘身誠知有道
理未敢勸交親恐為人所哂聊自書諸紳

秋遊平泉贈韋處士閒禪師

秋景引閒步山遊不知疲杖藜捨輿馬十里與僧期昔
嘗憂六十四體不支持今來已及此猶未苦衰羸

予往年有

詩云三十氣大壯四十多是非六十年太老四體不支持今故云

心興遇境發身力因

行知尋雲到起處愛泉聽滴時南村韋處士西寺閒禪師山頭與澗底聞健且相隨

遊坊口懸泉偶題石上

時為河南尹

濟源山水好老尹知之久常日聽人言今秋入吾手孔山刀劒立沁水龍蛇走危磴上懸泉澄灣轉坊口虛明見深底淨綠無纖垢仙棹浪悠揚塵纓風抖擻巖寒松柏短石古莓苔厚錦座纓高低翠屏張左右雖無安石

妓不乏文舉酒談笑逐身來管絃隨事有時逢杖錫客
或值垂綸叟相與澹忘歸自辰將及酉公門欲返駕溪
路猶迴首早晚重來遊心期罷官後

對火翫雪

平生所心愛愛火兼憐雪火是臘天春雪為陰夜月鵝
毛紛正墮獸炭敲初折盈尺白鹽寒滿爐紅玉熱稍宜
杯酌動漸引笙歌發但識歡來由不知醉時節銀盤堆
柳絮羅袖搏瓊屑共愁明日銷便作經年別

六年寒食洛下宴遊贈馮李二少尹

豐年寒食節美景洛陽城三尹皆強健七日盡清明東
郊蹋青草南園攀紫荆風拆海榴豔露墜木蘭英假開
春未老宴合日屢傾珠翠混花影管絃藏水聲佳會不
易得良辰亦難并聽吟歌暫輟看舞杯徐行米價賤如
土酒味濃於餠徐盈切此時不盡醉但恐負平生殷勤二
曹長各捧一銀觥

苦熱中寄舒負外

何堪日衰病復此時炎燠厭對俗杯盤倦聽凡絲竹
牀鋪晚雪角枕截寒玉安得清瘦人新秋夜同宿非君
固不可何夕枉高躅

閒夕

一聲早蟬發數點新螢度蘭缸耿無煙筠簟清有露未
歸後房寢且下前軒步斜月入低廊涼風滿高樹放懷
常自適遇境多成趣何法使之然心中無細故

寄情

灼灼早春梅，東南枝最早。持來翫未足，花向手中老。芳
香銷，掌握悵望生懷抱。豈無後開花，念此先開好。

舒負外遊香山寺數日不歸，兼辱尺書大誇勝
事，時正值坐衙慮囚之際，走筆題長句以贈
之。

香山石樓倚天開，翠屏碧立波環迴。黃菊繁時好客到，

碧雲合處佳人來。

謂遺英舊二妓
與舒君同遊

酡顏一笑天桃綻，清

唸數聲寒玉哀。軒騎逶遲棹容與，留連三日不能迴。白

頭老尹府中坐早衙纔退暮衙催庭前階上何所有累
囚成貫案成堆豈無池塘長秋草亦有絲竹生塵埃今
日清光昨夜月竟無人來勸一杯

早冬遊王屋自靈都抵陽臺上方望天壇偶吟

成章寄溫谷周尊師中書李相公

霜降山水清王屋十月時石泉碧漾漾巖樹紅離離朝
為靈都遊暮有陽臺期飄然世塵外鸞鶴如可追忽念
公程盡復慙身力衰天壇在天半欲上心遲遲嘗聞此

遊者隱客與損之各抱貴仙骨俱非泥垢姿二人相顧
言彼此稱男兒若不為松喬即須作臯夔今果如其語
光彩雙歲鞋一人佩金印一人翳玉芝我來高其事詠
歎偶成詩為君題石上欲使故山知

吳宮辭

淡紅花帔淺檀蛾睡臉初開似剪波坐對珠籠閒理曲
琵琶鸚鵡語相和

白氏長慶集卷二十二

欽定四庫全書

集部

白氏長慶集卷二十三
四

詳校官監察御史_臣查瑩

檢討_臣何思鈞覆勘

總校官知縣_臣繆琪

校對官助教_臣卜惟吉

謄錄監生_臣張同履

欽定四庫全書

白氏長慶集卷二十三

唐白居易撰

律詩

凡一百首

元微之除浙東觀察使喜得杭越隣州先贈長

句

十七首並與微之和答

稽山鏡水歡遊地
屏帶金章榮貴身
官職比君雖較小
封疆與我且為隣
郡樓對說千峯月
江界平分兩岸春

杭越風光詩酒主相看更合是何人

席上答微之

我住浙江西君去浙江東勿言一水隔便與千里同富
貴無人勸君酒今宵為我盡杯中

答微之上船後留別

燭下尊前一分手舟中岸上兩迴頭歸來虛白堂中夢
合眼先應到越州

答微之泊西陵驛見寄

煙波盡處一點白應是西陵古驛臺知在臺邊望不見
暮潮空送渡船迴

答微之誇越州州宅

賀上人回得報書大誇州宅似仙居厭看馮翊風沙久
喜見蘭亭煙景初日出旌旗生氣色月明樓閣在空虛
知君暗數江南郡除却餘杭盡不如

微之重誇州居其落句有西州羅刹之語因嘲
茲石聊以寄懷

君問西州城下事醉中疊紙為君書嵌空石面標羅刹
壓捺潮頭敵子胥神鬼曾鞭猶不動波濤雖打欲何如
誰知太守心相似抵滯堅頑兩有餘

張十八員外以新詩二十五首見寄郡樓月下
吟翫通夕因題卷後封寄微之

秦城南省清秋夜江郡東樓明月時去我三千六百里
得君二十五篇詩陽春曲調高難和淡水交情老始知
坐到天明吟未足重封轉寄與微之

酬微之

微之題云郡務稍簡因得整集舊詩并連綴剛削封章諫草繁委藉筭僅踰百

軸偶成自歎

兼寄樂天

滿篋填箱唱和詩少年為戲老成悲聲聲麗曲敲寒玉

句句妍辭綴色絲吟翫獨當明月夜傷嗟同是白頭時

由來才命相磨折天遣無兒欲怨誰

微之句云天遣兩家無嗣子欲將文

字付誰人故

以此荅之

餘思未盡加為六韻重寄微之

海內聲華併在身篋中文字絕無倫

美微之也

遙知獨對封

章草忽憶同為獻納臣走筆往來盈卷軸

予與微之前後寄和詩數

百篇近代無如此多有也

除官遞互掌絲綸

予除中書舍人微之撰制詞微之除翰林學士

予撰制詞

制從長慶辭高古

微之長慶初和制詰文格高古始變俗體繼者勅之也

詩

到元和體變新

衆稱元白為千字律詩或號元和格

各有文姬才雅齒

蔡邕

無兒有女琰字文姬

俱無通子繼餘塵

陶潛小兒名通子

琴書何必求王

粲與女猶勝與外人

荅微之詠懷見寄

閣中同直前春事船裏相逢昨日情分袂二年勞夢寐

並牀三宿話平生紫微北畔辭宮闕
滄海西頭對郡城
聚散窮通何足道
醉來一曲放歌行

酬微之誇鏡湖

我嗟身老歲方徂
君更官高興轉孤
軍門郡閣曾聞否
禹穴耶溪得到無
酒盞省陪波卷白
骰盤思共彩呼盧
一泓鏡水誰能羨
自有胷中萬頃湖

微之詩云孫園虎
寺隨宜看不必遠

遠羨鏡湖故以此戲言答之

雪中即事答微之

連夜江雲黃慘澹平明山雪白糝糊銀河沙漲三千里
梅嶺花排一萬株北市風生飄散麪東樓日出照凝酥
誰家高士關門戶何處行人失道途舞鶴庭前毛稍定
擣衣砧上練新鋪戲團稚女呵紅手愁坐衰翁對白鬚
壓瘴一州除疾苦呈豐萬井盡歡娛含玉德懷君子
寒助霜威憶大夫莫道煙波一水隔何妨氣候兩鄉殊
越中地暖多成雨還有瑤臺瓊樹無

醉封詩筒寄微之

一生休戚與窮通處處相隨事事同
未死又憐滄海郡無兒俱作白頭翁
展眉只仰三杯後代面唯憑五字中
為向兩州郵吏道莫辭來去遞詩筒

除夜寄微之

鬢毛不覺白氍毹

蘇舍切

一事無成百不堪共惜盛時辭

闕下同嗟除夜在江南家山泉石尋常憶
世路風波子細諳老校於君合先退
明年半百又加三

蘇州李中丞以元日郡齋感懷詩寄微之及子

輒依來篇七言八韻走筆奉答兼呈微之

白首餘杭白太守落魄拋名來已久一辭渭北故園春
再把江南新歲酒杯前笑歌徒勉強鏡裏形容漸衰朽
領郡慚當潦倒年隣州喜得平生友長洲草接松江岸
曲水花連鏡湖口老去還能痛飲無春來曾作閒遊否
憑鶯傳語報李六倩鴈將書與元九莫嗟一日日催人
且貴一年年入手

早春西湖閒遊悵然興懷憶與微之同賞因思

在越官重事殷鏡湖之遊或恐未暇偶成十
八韻寄微之

上馬復呼賓湖邊景氣新
管絃三數事騎從十餘人
立換登山屐行攜漉酒巾
逢花看當妓遇草坐為茵
西日籠黃柳東風蕩白蘋
小橋裝鴈齒輕浪覓魚鱗
畫舫牽徐轉銀船酌慢巡
野情遺世累醉態任天真
彼此年將老平生分最親
高天從所願遠地得為隣
雲樹分三驛煙波限一津
飜嗟寸步隔却厭尺書頻
浙右稱雄鎮山

陰委重臣貴，垂長紫綬榮。駕大朱輪出，動刀槍隊歸。生
道路塵，鴈驚弓易散。鷗怕鼓，難馴百吏瞻。相面千夫捧，
擁身自然閒。興少應負鏡，湖春

荅微之見寄

時在郡樓對雪

可憐風景浙東西，先數餘杭次會稽。禹廟未勝天竺寺，
錢湖不羨若耶溪。擺塵野鶴春毛暖，拍水沙鷗濕翅低。
更對雪樓君愛否，紅欄碧甃點銀泥。

祭社宵興燈前偶作

城頭傳鼓角燈下整衣冠
夜鏡藏鬚白秋泉漱齒寒
欲將閒送老須著病辭官
更待年終後支持歸計看

閒卧

盡日前軒卧神閒境亦空
有山當枕上無事到心中
簾卷侵牀日屏遮入座風
望春春未到應在海門東

新春江次

浦乾潮未應堤濕凍初銷
粉片粧梅朵金絲刷柳條
鴨頭新綠水鴈齒小紅橋
莫怪珂聲碎春來五馬驕

春題湖上

湖上春來似畫圖
亂峯圍繞水平鋪
松排山面千重翠
月點波心一顆珠
碧毯線頭抽早稻
青羅裙帶展新蒲
未能拋得杭州去
一半勾留是此湖

早春憶微之

昏昏老與病相和
感物思君歎復歌
聲早難先知夜短
色濃柳最占春多
沙頭雨染斑斑草
水面風驅瑟瑟波
可道眼前光景惡
其如難見故人何

失鶴

失為庭前雪飛因海上風九霄應得侶三夜不歸籠聲
斷碧雲外影沉明月中郡齋從此後誰伴白頭翁

自感

宴遊寢食漸無味杯酒管絃徒繞身賓客歡娛僮僕飽
始知官職為他人

得湖州崔十八使君書喜與杭越隣郡因成長
句代賀兼寄微之

三郡何因此結緣貞元科第忝同年故情歡喜開書後
舊事思量在眼前越國封疆吞碧海杭城樓閣入青煙
吳興卑小君應屈為是蓬萊最後仙

貞元初同登科在
君名最在後當時

崔自詠云人間不會雲
間事應笑蓬萊最後仙

同諸客攜酒早看櫻桃花

曉報櫻桃發春攜酒客過綠飴

徐盈切

粘盞杓紅雪壓枝

柯天色清明少人生事故多停杯替花語不醉擬如何

柳絮

三月盡時頭白日與春老別更依依憑鶯為向楊花道
絆惹春風莫放歸

早飲湖州酒寄崔使君

一榼扶頭酒泓澄瀉玉壺十分蘸甲酌潑灩滿銀盃捧
出光華動嘗看氣味殊手中稀琥珀舌上冷醍醐瓶裏
有時盡江邊無處沽不知崔太守更有寄來無

病中書事

三載卧山城閒知節物情鶯多過春語蟬不待秋鳴氣

嗽因寒發風痰欲雨生病身無所用唯解卜陰晴

與微之唱和來去常以竹筒貯詩陳協律美而
成篇因以此答

揀得琅玕截作筒緘題章句寫心胷隨風每喜飛如鳥
渡水常憂化作龍粉節堅如太守信霜筠冷稱大夫容
煩君讚詠心知愧魚目驪珠同一封

醉戲諸妓

席上爭飛使君酒歌中多唱舍人詩不知明日休官後

逐我東山去是誰

北院

北院人稀到東牕地最偏竹煙行竈上石壁卧房前性
拙身多暇心慵事少緣還如病居士唯置一牀眠

酬周協律

五十錢塘守應為送老官溫蒙辭客愛猶作近臣看鑿
落愁須飲琵琶悶遣彈白頭雖強醉不似少年歡

題石上人

騰騰兀兀在人間貴賤賢愚盡往還
羶膩筵中唯飲酒歌鐘會處獨思山
存神不許三尸住混俗無妨兩鬢斑
除却餘杭白太守何人更解愛君閒

詩解

新篇日日成不是愛聲名舊句時時改
無妨悅性情但令長守郡不覺却歸城
祇擬江湖上吟哦過一生

潮

早潮纔落晚潮來一月周流六十回
不獨光陰朝復暮

杭州老去被潮催

聞歌妓唱嚴郎中詩因以絕句寄之

嚴前為
郎守

已留舊政布中和又付新詞與艷歌
但是人家有遺愛就中蘇小感恩多

柘枝妓

平鋪一合錦筵開連擊三聲畫鼓催
紅蠟燭移桃葉起紫羅衫動柘枝來
帶垂鈿胯花腰重帽轉金鈴雪面迴
看即曲終留不住雲飄雨送向陽臺

急樂世辭

正抽碧線繡紅羅
忽聽黃鶯斂翠蛾
秋思冬愁春悵望
大都不稱意時多

天竺寺送堅上人歸廬山

錫杖登高寺
香爐憶舊峯
偶來舟不繫
忽去鳥無蹤
豈要留離偈
寧勞動別容
與師俱是夢
夢裏暫相逢

除官赴闕留贈微之

去年十月半
君來過浙東
今年五月盡
我發向關中
兩

鄉默默心相別一水盈盈路不通從此津人應省事寂
寥無復述詩筒

留題郡齋

吟山歌水嘲風月便是三年官滿時春為醉眠多閉閣
秋因晴望暫褰帷更無一事移風俗唯化州民解詠詩

別州民

耆老遮歸路壺漿滿別筵甘棠無一樹那得淚潛然稅
重多貧戶農饑足旱田唯留一湖水與汝救凶年

今春
增纂

錢塘湖堤貯水
以防天旱故云

留題天竺靈隱兩寺

在郡六百日入山十二回宿因月桂落醉為海榴開

竺天竺

常有月中桂子落靈隱多海石榴花也

黃紙除書到青宮詔命催僧徒多

悵望賓從亦徘徊寺閣煙埋竹林香雨落梅別橋憐白

石辭洞戀青苔

石橋在天竺明洞在靈隱

漸出松間路猶飛馬上杯

誰教冷泉水送我下山來

西湖留別

征途行色慘風煙祖帳離聲咽管絃翠黛不須留五馬
皇恩只許住三年綠藤陰下鋪歌席紅藕花中泊妓船
處處回頭盡堪戀就中難別是湖邊

重寄別微之

憑仗江波寄一辭不須惆悵報微之猶勝往歲峽中別
灩澦堆邊招手時

重題別東樓

東樓勝事我偏知氣象多隨昏旦移湖卷衣裳白重疊

山張屏障綠參差海仙樓塔晴方出江女笙簫夜始吹

春雨星攢尋蟹火秋風霞颭弄濤旗

餘杭風俗每寒食雨後夜涼家家持

燭尋蟹動盃萬人每歲八月迎濤弄水者悉舉旗幟馬

宴宜雲髻新梳後曲愛霓

裳未拍時太守三年嘲不盡郡齋空作百篇詩

別周軍事

主人頭白官仍冷去後憐君是底人試謁會稽元相去
不妨相見却殷勤

看常州柘枝贈賁使君

莫惜新衣舞柘枝也從塵污汗雷垂料君即却歸朝去
不見銀泥衫故時

汴河路有感

三十年前路孤舟重往還繞身新眷屬舉目舊鄉關事
去唯留水人非但見山啼襟與愁鬢此日兩成斑

埭橋舊業

別業埭城北拋來二十春改移新逕路變換舊村隣有
稅田疇薄無官弟姪貧田園何用問強半屬他人

茅城驛

汴河無景思秋日又淒淒地薄桑麻瘦村貧屋舍低早
苗多閒草濁水半和泥最是蕭條處茅城驛向西

河陰夜泊憶微之

憶君我正泊行舟望我君應上郡樓萬里月明同此夜
黃河東面海西頭

杭州迴舫

自別錢塘山水後不多飲酒懶吟詩欲將此意憑迴棹

報與西湖風月知

途中題山泉

決決涌岩穴濺濺出洞門
向東應入海從此不歸源
似葉飄辭樹如雲斷別根
吾身亦如此何日返鄉園

欲到東洛得楊使君書因以此報

向公心切向財疎
淮上休官洛下居
三郡政能從獨步
十年生計復何如
使君灘上久分手
別駕渡頭先得書
且喜平安又相見
其餘外事盡空虛

洛下寓居

秋館清涼日書因解悶看夜牕幽獨處琴不為人彈遊
宴慵多廢趨朝老漸難禪僧教斷酒道士勸休官渭曲
莊猶在錢塘俸尚殘如能使歸去亦不至飢寒

味道

叩齒晨興秋院靜焚香宴坐晚牕深七篇真誥論仙事
一卷檀經說佛心此日盡知前境妄多生曾被外塵侵
自嫌習性猶殘處愛詠閒詩好聽琴

好聽琴

本性好絲桐塵機間即空一聲來耳裏萬事離心中清
暢堪銷疾恬和好養蒙尤宜聽三樂安慰白頭翁

愛詠詩

辭章諷詠成千首心行歸依向一乘坐倚繩牀間自念
前生應是一詩僧

酬皇甫庶子見寄

掌綸不稱君應笑典郡無能我自知別詔忽驚新命出

同寮偶與夙心期
春坊瀟洒優閒地
秋鬢蒼浪老大時
獨占二疎應未可
龍樓見擬覓分司

卧疾

閒官卧疾絕經過
居處蕭條近洛河
水北水南秋月夜
管絃聲少杵聲多

遠師

東宮白庶子
南寺遠禪師
何處遙相見
心無一事時

問遠師

葦簾停夜食吟詠散秋懷笑問東林老詩應不破齋

小院酒醒

酒醒閒獨步小院夜深涼一領新秋簟三間明月廊未
收殘盞杓初換熱衣裳好是幽眠處松陰六尺牀

贈侯三郎中

老愛東都好寄身足泉多竹少埃塵年豐最喜唯貧客
秋冷先知是瘦人幸有琴書堪作伴苦無田宅可為隣
洛中縱未長居得且與蘇田遊過春

求分公司東都寄牛相公十韻

忽忽心如夢，星星鬢似絲。
縱貧長有酒，雖老未拋詩。
儉薄身都慣，疎頑性頗宜。
飯粗飧亦飽，被暖起常遲。
萬里

歸何得三年伴，是誰華亭鶴不去。
天竺石相隨

余罷杭州得華

亭鶴天竺石同載而歸

王尹貫將馬，田家賣與池。
開門閒坐日，遶

水獨行時。
懶慢交游許，衰羸相府知。
官寮幸無事，可惜不分公司。

酬楊八

君以曠懷宜靜境我因塞步稱閒官
閉門足病非高士
勞作雲心鶴眼看

履道新居二十韻

履道坊西角官河曲北頭
林園四隣好風景一家秋
門閉深沉樹池通淺沮

秋夜反

溝拔青松直上鋪碧水平流

籬菊黃金合牕筠綠玉稠
疑連紫陽洞似到白蘋洲
僧至多同宿賓來輒少留
豈無詩引興兼有酒銷憂
移榻臨平岸攜茶上小舟
果穿間鳥啄萍破見魚遊
地與塵

相遠人將境共幽
汎潭菱點鏡沉浦月生鈎
厨曉煙孤起庭寒雨
半收老飢初愛粥瘦冷早披裘
洛下招新隱秦中忘舊遊
辭章留鳳閣班籍寄龍樓
病慙官曹靜閒慙俸祿
優琴書中有得衣食外何求
濟世才無取謀身智不周
應須共心語萬事一時休

九日思杭州舊遊寄周判官及諸客

忽憶郡南山頂上
昔時同醉是今辰
笙歌委曲聲延耳
金翠動搖光照身
風景不隨官相去
歡娛應逐使君新

江山賓客皆如舊
唯是當筵換主人

秋晚

煙景澹濛濛
池邊微有風
覺寒蟄近壁
知暝鶴歸籠
長貌隨年改
衰情與物同
夜來霜厚薄
梨葉半低紅

分司

散帙留司殊有味
最宜病拙不才身
行香拜表為公事
碧洛青嵩當主人
已出閒遊多到夜
却歸慵卧又經旬
錢塘五馬留三匹
還擬騎遊攪擾春

河南王尹

一作王僕射

初到以詩代書先問之

別來王閣老三歲似須更鬢上斑多少杯前興有無官
從分緊慢情莫問榮枯許入朱門否籃輿一病夫

池西亭

朱欄映晚樹金魄落秋池還似錢塘夜西樓月出時

臨池閒卧

小竹圍庭匝平池與砌連閒多臨水坐老愛向陽眠營
役拋身外幽竒送枕前誰家卧牀脚解繫釣魚船

吾廬

吾廬不獨貯妻兒自覺年侵身力衰
眼下營求容足地心中準擬挂冠時
新昌小院松當戶履道幽居竹遶池
莫道兩都空有宅林泉風月是家資

題新居寄宣州崔相公

所居南隣
即崔家池

門庭有水巷無塵好稱閒官作主人
冷似崔羅雖少客寬於蝸舍足容身
疎通竹徑將迎月掃掠莎臺欲待春
濟世料君歸未得南園北曲謾為隣

憶杭州梅花因叙舊遊寄蕭協律

三年閒悶在餘杭，曾為梅花醉幾場。
伍相廟邊繁似雪，孤山園裏麗如粧。
蹋隨遊騎心長惜，折贈佳人手亦香。
賞自初開直至落，歡因小飲便成狂。
薛劉相次埋新壠，沈謝雙飛出故鄉。
薛劉二客沈謝二妓皆當時歌酒之侶
歌伴酒徒零散盡，唯殘頭白老蕭郎。

病中辱張常侍題集賢院詩因以繼和

天祿閣門開甘泉侍從回，圖書皆帝籍寮友盡仙才。
騎

省通中掖龍樓隔上臺猶憐病宮相詩寄洛陽來

早春晚歸

晚歸騎馬過天津沙白橋紅返照新草色連延多隙地
鼓聲閒緩少忙人還如南國饒溝水不似西京足路塵
金谷風光依舊在無人管領石家春

贈楊使君

曾嗟放逐同巴峽且喜歸還會洛陽時命到來須作用
功名未立莫思量銀銜叱撥欺風雪金屑琵琶費酒漿

更待城東桃李發共君沉醉兩三場

贈皇甫庶子

何因散地共徘徊人道君才我不才
騎少馬蹄生易蹶用稀印鑠澀難開
妻知年老添衣絮婢報天寒撥酒醅
更媿小胥諂拜表單衫衝雪夜深來

池上竹下作

穿籬遶舍碧逶迤十畝閒居半是池
食飽窓閒新睡後脚輕林下獨行時
水能性淡為吾友竹解心虛即我師

何必悠悠人世工勞心費目覓親知

閒出覓春戲贈諸郎官

年來數出覓風光亦不全閒亦不忙放鞍體安騎穩馬
隔袍身暖照晴陽迎春日日添詩思送老時時放酒狂
除却鬚鬚白一色其餘未伏少年郎

別春爐

暖閣春初入溫爐興稍闌晚風猶冷在夜火且留看獨
宿相依久多情欲別難誰能共天語長遣四時寒

汎小輪二首

輪龍春切

水一塘輪一隻輪頭漾漾知風起
輪背蕭蕭知雨滴醉
卧船中欲醒時忽疑身是江南客

船緩進水平流一莖竹篙別船尾
兩幅青幕覆船頭亞
竹亂藤多照岸如從鳳口向湖洲

夢行簡

天氣妍和水色鮮閒吟獨步小橋邊
池塘草綠無佳句
虛卧春窓夢阿憐

題新居呈王尹兼簡府中三掾

敝宅須重葺貧家乏羨財橋憑川守造樹倩府僚栽朱
板新猶濕紅英暖漸開仍期更攜酒倚檻看花來

雲和

非琴非瑟亦非箏撥柱推弦調未成欲散白頭千萬恨
只消紅袖兩三聲

春老

欲隨年少強遊春自覺風光不屬身歌舞屏風花障上

幾時曾畫白頭人

春雪過皇甫家

晚來籃輦雪中回
喜遇君家門正開
唯要主人青眼待
琴詩談笑自將來

崔侍御以孩子三日示其所生詩見示因以二
絕和之

洞房門上挂桑弧
香水盆中浴鳳雛
還似初生三日魄
嫦娥滿月即成珠

愛惜肯將同寶玉
喜歡應勝得王侯
美璋詩句多才思
愁殺無兒老鄧攸

與皇甫庶子同遊城東

閒遊何必多徒侶
相勸時時舉一杯
博望苑中無職役
建春門外足池臺
綠油剪葉蒲新長
紅蠟粘枝杏欲開
白馬朱衣兩宮相
可憐天氣出城來

洛城東花下作

記得舊詩章
花多數洛陽
舊詩云洛陽城東面今來花似雪又云更待城東桃李發

又云花滿洛陽城

及逢枝似雪已是鬢成霜
向後光陰促從前
事意忙無因重年少
何計駐時苦欲送愁離面
須傾酒入腸
白頭無籍在醉倒亦何妨

晚春寄微之并崔湖州

洛陽陌上少交親
履道城邊欲暮春
崔在吳興元在越
出門騎馬覓何人

城東閒行因題尉遲司業水閣

閒遠洛陽城無人知姓名
病乘籃輿出老著茵

倉見切
染紅草

衫行處處花相引
時時酒一傾
借君溪閣上
醉詠兩三聲

寄皇甫七

孟夏愛吾廬
陶潛語不虛
花樽飄落酒
風案展開書
隣女偷新果
家僮漉盧谷切小魚
不知皇甫七
池上興何如

訪皇甫七

上馬行數里
逢花傾一杯
更無停泊處
還是覓君來

白氏長慶集卷二十三

欽定四庫全書

白氏長慶集卷二十四

唐白居易撰

律詩

凡一百首

除蘇州刺史別洛城東花

亂雪千花落新絲
兩鬢生老除吳郡
守春別洛陽城江
上今重去城東更
一行別花何用伴
勸酒有殘鶯

奉和汴州令狐令公二十二韻

客有東征者夷門一落帆二年方得到五日未為淹

府相

領鎮隔年居易方到既到陪奉遊宴凡經五日

在浚旌重葺遊梁館更添心因

好善樂貌為禮賢謙俗阜知敦勸民安見察廉仁風扇

平道路陰雨膏

去聲

閭閻文律操將柄兵機釣得鈴碧幢

油葉葉紅旆火旂旂景象春加麗威容曉助嚴槍森赤

豹尾轟吒

丑亞切

黑龍髯門靜塵初斂城昏日半暝選幽

開後院占勝坐前簷平展絲頭毯

吐敢切

高褰錦額簾雷

槌柘枝鼓雪擺胡騰衫髮滑歌釵墜粧光舞汗雷回燈

花簇簇過酒玉纖纖饌盛盤心殢醅濃盞底粘陸珍熊
掌爛海味蟹螯鹹福履千夫祝形儀四座瞻羊公長在
峴傳說莫歸巖蓋祝者
詩意也眷愛人人遍風情事事兼猶嫌
客不醉同賦夜厭厭

船夜援琴

鳥棲魚不動月照夜江深身外都無事舟中只有琴
絃為益友兩耳是知音心靜即聲淡其間無古今

答劉和州禹錫

換印雖頻命未通
歷陽湖上又秋風
不教才展休明代
為罰詩爭造化功
我亦思歸田舍下
君應厭卧郡齋中
好相收拾為閒伴
年齒官班約畧同

渡淮

淮水東南濶無風
渡亦難孤煙生乍直
遠樹望多圓
春浪棹聲急
夕陽帆影殘
清流宜映月
今夜重吟看

赴蘇州至常州答賈舍人

杭城隔歲轉蘇臺
還擁前時五馬回
厭見簿書先眼合

喜逢杯酒暫眉開
未酬恩寵年空去
欲立功名命不來
一別承明三領郡
甘從人道是粗才

去歲罷杭州
今春領吳郡
慙無善政聊寫鄙懷
兼寄三相公

為問三相相如何
秉國鈞那將最劇郡
付與苦慵人豈
有吟詩客堪為持節臣
不才空飽暖無惠及饑貧
昨卧
南城月今行北境
春鉛刀磨欲盡銀印換何頻
抗老遮
車轍吳童掃路塵
虛迎復虛送慙見兩州民

宣武令狐相公以詩寄贈傳播吳中聊奉短章

用伸酬謝

新詩傳詠忽紛紛
楚老吳娃耳遍聞
盡解呼為好才子
不知官是上將軍
辭人命薄多無位
戰將功高少有文
謝眺篇章韓信鉞
一生雙得不如君

自詠

形容瘦薄詩情苦
豈是人間有相人
只合一生眠白屋
何因三度擁朱輪
金章未佩雖非貴
銀槥常攜亦不貧

唯是無兒頭早白被天磨折恰平均

吟前篇因寄微之

君顏貴茂不清羸君句雄華不苦悲何事遣君還似我
鬢鬚早白亦無兒

紫薇花

紫薇花對紫薇翁名目雖同貌不同獨占芳菲當夏景
不將顏色託春風潯陽官舍雙高樹興善僧庭一大叢
何似蘇州安置處花堂欄下月明中

自到郡齋僅經旬日方專公務未及宴遊偷閒
走筆題二十四韻兼寄常州賈舍人湖州崔

郎中仍呈吳中諸客

渭北離鄉客江南守土臣涉途初改月入境已經旬甲
郡標天下環封極海濱版圖十萬戶兵籍五千人自顧

才能少何堪寵命頻冒禁慙印綬虛獎負絲綸

除蘇州制云藏

於己為道義施於物為政能在公
形骨鯁之志閭境有袴襦之樂

候病須通脈防流要

塞津救煩無若靜補拙莫如勤削使科條簡攤令賦役

均以茲為報効安敢不躬親襦袴提於手韋弦佩在紳

敢辭稱俗吏且願活疲民常

常州

未徵黃霸湖

湖州

猶借冠

恂愧無鐺脚政

河北三郡相隣皆有善政時為鐺脚刺史見唐書

徒忝大牙隣

制誥誇黃絹

美雷常州也

詩篇占白蘋

美崔吳興也

銅符拋不得

自謂也

瓊樹見無因警寐鐘傳夜催衙鼓報晨唯知對胥

吏未暇接親賓色變雲迎夏聲殘鳥過春麥風非逐扇

梅雨異隨輪武寺山如故

武丘寺也

王樓月自新

郡內東南樓名也

池塘閒長草絲竹廢生塵暑遣燒神酎晴教煦舞茵待

還公事了亦擬樂吾身

題籠鶴

經旬不飲酒踰月未聞歌豈是風情少其如塵事多虎丘慙客問娃館妬人過莫笑籠中鶴相看去幾何

答客問杭州

為我踟躕停酒盞與君約畧說杭州山名天竺堆青黛湖號錢塘瀉綠油大屋簷多裝鴈齒小航船亦畫龍頭所嗟水路無三百官繫何因得再遊

登閬門閒望

閬門四望鬱蒼蒼始覺州雄土俗強
十萬夫家供課稅五千子弟守封疆
閬城碧鋪秋草烏鵲橋紅帶夕陽
處處樓前飄管吹家家門外泊舟航
雲埋虎寺山藏色月耀娃宮水放光
曾賞錢塘兼茂苑今來未敢苦誇張

代諸妓贈送周判官

妓筵今夜別姑蘇客棹明朝向鏡湖
莫汎扁舟尋范蠡且隨五馬覓羅敷
蘭亭月破能迴否娃館秋涼却到無

好與使君為老伴歸來休染白髭鬚

秋寄微之十二韻

娃館松江北稽城浙水東屈君為長吏伴我作衰翁旌

旆知非遠煙雲望不通忙多對酒慙興少閱詩筒

此在杭州

兩浙唱和詩贈答於簡中遞往來

淡白秋來日踈涼雨後風餘霞數片

綺新月一張弓影滿衰桐樹香凋晚蕙叢飢啼春穀鳥

寒怨絡絲蟲覽鏡頭雖白聽歌耳未聾老愁從此遣醉

笑與誰同清旦方堆案黃昏始退公可憐朝暮景銷在

兩衙中

池上早秋

荷芰綠參差新秋水滿池早涼生北檻殘照下東籬露
飽蟬聲懶風乾柳意衰過潘二十歲何必更愁悲

郡西亭偶詠

常愛西亭面北林公私塵事不能侵共閒作伴無如鶴
與老相宜只有琴莫遣是非分作界須教吏隱合為心
可憐此道人皆見但要修行功用深

故衫

闇淡緋衫稱老身半披半曳出朱門袖中吳郡新詩本
襟上杭州舊酒痕殘色過梅看向盡故香因洗嗅猶存
曾經爛熳三年著欲棄空箱似少恩

郡中夜聽李山人彈三樂

風琴秋拂匣月戶夜開闌榮啟先生樂姑蘇太守閒傳
聲千古後得意一時閒却怪鍾期耳唯聽水與山

東城桂三首

并序

蘇之東城古吳都城也今為樵牧之場有桂一株生乎
城下惜其不得地因賦三絕句以言之

子墮本從天竺寺根盤今在闔閭城當時應逐南風落
落向人間取次生

舊說杭州天竺寺每
歲秋中有月桂子墮

霜雪壓多雖不死
荆榛長疾欲相埋
長憂落在樵人手
賣作蘇州一束柴

遙知天上桂花孤
試問嫦娥更要無
月宮幸有閒田地
何不中央種兩株

間行簡恩賜章服喜成長句寄之

吾年五十加朝散爾亦今年賜服章齒髮恰同知命歲

官銜俱是客曹郎

予與行簡俱年五十始著緋皆是主客郎官

榮傳錦帳花

聯萼彩動綾袍鴈趁行

緋多以鴈銜瑞莎為之也

大抵著緋宜老大

莫嫌秋鬢數莖霜

喚笙歌

露墜菱花槿風吹敗葉荷老心歡樂少秋眼感傷多芳

歲今如此衰翁可奈何猶應不如醉試遣喚笙歌

對酒吟

一拋學士筆三佩使君符未換銀青綬唯添雪白鬚公
門衙退掩妓席客來鋪履舄從相近謳吟任所須金銜
嘶五馬鈿帶舞雙姝不得當年有猶勝到老無合聲歌
漢月齊手拍吳歛今夜還先醉應煩紅袖扶

偶飲

三盞醺醺四體融妓亭簷下夕陽中千聲方響鼓相續
一曲纔和憂未終今日心情如往日秋風氣味似春風

金史卷一百一十五
第廿四
唯憎小吏樽前報道去衙時水五筒

早發赴洞庭舟中作

閭門曙色欲蒼蒼星月高低宿水光
棹舉影搖燈燭動舟移聲拽管絃長
漸看海樹紅生日遙見包山白帶霜
出郭已行十五里唯銷一曲慢霓裳

宿湖中

水天向晚碧沉沉樹影霞光重疊深
浸月冷波千頃練芭霜新橘萬株金
幸無案牘何妨醉縱有笙歌不廢吟

十隻畫船何處宿
洞庭山脚太湖心

揀貢橘書情

洞庭貢橘揀宜精
太守勤王請自行
珠顆形容隨日長
瓊漿氣味得霜成
登山敢惜駑駘力
望闕難伸螻蟻情
疎賤無由親跪獻
願憑朱實表丹誠

夜泛陽塢入明月灣即事寄崔湖州

湖山處處好淹留
最愛東灣北塢頭
掩映橘林千點火
泓澄潭水一盆油
龍頭畫舸銜明月
鵲脚紅旗蘸碧流

為報茶山崔太守與君各是一家遊

嘗羨吳興每春茶山之遊泊入太湖

羨意減矣故云

泛太湖書事寄微之

煙渚雲帆處處通
飄然舟似入虛空
玉杯淺酌巡初匝
金管徐吹曲未終
黃夾纈林寒有葉
碧琉璃水淨無風
避旗飛鷺翩翩白
驚鼓跳魚撥刺紅
澗雪壓多松偃蹇
巖泉滴久石玲瓏
書為故事留湖上

所見勝景多記在湖中石上吟

作新詩寄浙東軍府威容從道盛
江山氣色定知同報

君一事君應羨五宿澄波皓月中

題新館

曾為白社羈遊子今作朱門醉飽身
十萬戶州尤覺貴二千石祿敢言貧
重裘每念單衣士兼味嘗思旅食人
新館寒來多少客欲回歌酒暖風塵

西樓喜雪命宴

宿雲黃慘澹曉雪白飄飄散麴遮槐市
堆花壓柳橋四郊鋪縞素萬室甃瓊瑤
銀榼攜桑落金爐上麗譙光迎

舞妓動寒近醉人銷歌樂雖盈耳慙無五袴謠

新栽梅

池邊新種七株梅欲到花時點檢來莫怕長洲桃李妬
今年好為使君開

酬劉和州戲贈

錢塘山水接蘇臺兩地褰帷愧不才政事素無爭學得
風情舊有且將來雙蛾解解佩啼相送五馬鳴珂笑却回
不似劉郎無景行長拋春恨在天台

戲和賈常州醉中二絕句

聞道毘陵詩酒興近來積漸學姑蘇

過合切網從上掩之也

頭

新令從偷去刮骨清吟得侶無

越調管吹留客曲吳吟詩送煖寒杯娃宮無限風流事
好遣孫心暫學來

歲暮寄微之三首

微之別久能無歎知退書稀豈免愁甲子百年過半後
光陰一歲欲終頭池水曉合膠船底樓雪晴銷露瓦溝

自覺歡情隨日減蘇州心不及杭州

榮進雖頻退亦頻與君才命不調勻若不九重中掌事
即須千里外拋身紫垣南北廳曾對滄海東西郡又隣
唯欠結廬蒿洛下一時歸去作閒人

白頭歲暮苦相思除却悲吟無可為枕上從妨一夜睡

燈前讀盡十年詩

讀前後
唱和詩

龍鍾校正騎驢日頗賴通江

司馬時

通州
江州

若並如今是全活紆朱拖紫且開眉

歲日家宴戲示弟姪等兼呈張侍御二十八丈

殷判官二十三兄

弟妹妻孥小姪甥嬌癡弄我助歡情歲盈後推藍尾酒

春盤先勸膠牙餠

徐盈切

形骸潦倒雖堪歎骨肉團圓亦

可榮猶有誇張少年處笑呼張丈喚殷兄

正月三日間行

黃鸝巷口鶯欲語烏鵲河頭冰欲銷

黃鸝坊名
烏鵲河名

綠浪東

西南北水紅欄三百九十橋

蘇之官
橋之數

鴛鴦蕩漾雙雙翅

楊柳交加萬萬條借問春風來早晚只從前日到今朝

夜歸

逐勝移朝宴留歡放晚衙
賓寮多謝客騎從半吳娃到
處銷春景歸時及月華
城陰一道直燭焰兩行斜
東吹先催柳南霜不殺花
臯橋夜沽酒燈火是誰家

自歎

豈獨年相迫兼為病所侵
春來痰氣動老去嗽聲深
眼暗猶操筆頭斑未挂簪
因循過日月真是俗人心

郡中閒獨寄微之及崔湖州

少年賓旅非吾輩
晚歲簪纓束我身
酒散更無同宿客
詩成長作獨吟人
蘋洲會面知何日
鏡水離心又一春
兩處也應相憶在
官高年長少情親

小舫

小舫一艘新造了
輕裝梁柱庠安篷
深坊靜岸遊應遍
淺水低橋去盡通
黃柳影籠隨棹月
白蘋香起打頭風
慢牽欲傍櫻桃泊
借問誰家花最紅

馬墜強出贈同座

足傷遭馬墜腰重倩人檯祇合牕間卧何因花下來坐
依桃葉妓行呷地黃杯強出非他意東風落盡梅

夜間賈常州崔湖州茶山境會想羨歡宴因寄

此詩

遙間境會茶山夜珠翠歌鐘俱遶身盤下中分兩州界

燈前合

音閤

作一家春青娥遞舞應爭妙紫笋齊嘗各

關新自歎花時北牕下蒲黃酒對病眠人

時馬墜損腰
正勸蒲黃酒

酬微之開拆新樓初畢相報未聯見戲之作

海山鬱鬱石稜稜新豁高居正好登
南臨瞻部三千界東對蓬宮十二層
報我樓成秋望月把君詩讀夜回燈
無妨却有他心眼粧點亭臺即不能

病中多雨逢寒食

水國多陰常懶出老夫饒病愛閒眠
三旬卧度驚花月一半春銷風雨天
薄暮何人吹甌篋新晴幾處縛鞦韆
綵繩芳樹長如舊唯是年年換少年

清明夜

好風隴月清明夜
碧砌紅軒刺史家
獨遶迴廊行復歇
遙聽絃管暗看花

蘇州柳

金谷園中黃嬋娜
曲江亭畔碧婆娑
老來處處行應徧
不似蘇州柳最多
絮撲白頭條拂面
使君無計奈春何

婆娑一作能娑

三月二十八日贈周判官

一春惆悵殘三日
醉問周郎憶得無
柳絮送人鶯勸酒

去年今日別東都

偶作

紅杏初生葉青梅已綴枝
闌珊花落後寂寞酒醒時坐
悶低眉久行慵舉足遲少年
君莫怪頭白自應知

重答劉和州

來篇云蘇州刺史例能詩西掖吟
來替左司又云若共吳王闕百草

不如唯是
欠西施

分無佳麗敵西施敢有文章替左司
隨分笙歌聊自樂
等閒篇詠被人知
花邊妓引尋香徑
月下僧留宿劍池

可惜當時好風景吳王應不解吟詩

採香徑在館娃宮

奉送三兄

少年曾管二千兵
晝聽笙歌夜斫營
自反丘園頭盡白
每逢旗鼓眼猶明
杭州暮醉連牀卧
吳郡春遊並馬行
自愧阿連官職慢
只教兄作使君兄

城上夜宴

留春不住登城望
惜夜相將秉燭遊
風月萬家河兩岸
笙歌一曲郡西樓
詩聽越客吟何苦
酒被吳娃勸不休

從道人生都是夢夢中歡笑亦勝愁

重題小舫贈周從事兼戲微之

細蓬青篾織魚鱗小眼紅牕襯麴塵闊狹纔容從事座
高低恰稱使君身舞筵須揀腰輕女仙棹難勝骨重人
不似鏡湖廉使出高檣大扁音偏開驚春

吳櫻桃

含桃最說出東吳香色鮮濃氣味殊洽恰舉頭千萬顆
娉娉拂面兩三株鳥偷飛處銜將火人摘爭時蹋破珠

可惜風吹兼雨打明朝後日即應無

春盡勸客酒

林下春將盡池邊日半斜櫻桃落砌顚夜合隔簾花
酒留閒客行茶使小娃殘杯勸不飲留醉向誰家

仲夏齋居偶題八韻寄微之及崔湖州

腥血與葷蔬停來一月餘肌膚雖瘦損方寸任清虛
體適通宵坐頭慵隔日梳眼前無俗物身外即僧居
水榭風來遠松廊雨過初塞簾放巢燕投食施池魚久別聞

遊伴頻勞問疾書不知湖與越吏隱興何如

官宅

紅紫共紛紛祇承老使君移舟木蘭棹行酒石榴裙水
色窸窸見花香院院間戀他官舍住雙鬢白如雲

六月三日夜聞蟬

荷香清露墜柳動好風生微月初三夜新蟬第一聲乍
聞愁北客靜聽憶東京我有竹林宅別來蟬再鳴不知
池上月誰撥小船行

蓮石

青石一兩片白蓮三四枝寄將東洛去心與物相隨石
倚風前樹蓮栽月下池遙知安置處預想發榮時領郡
來何遠還鄉去已遲莫言千里別歲晚有心期

眼病二首

散亂空中千片雪蒙籠物上一重紗縱逢晴景如看霧

不是春天亦見花

已上四句皆病眼中所見者

僧說客塵來眼界醫

言風眩在肝家兩頭治療何曾瘥藥力微茫佛力賒

眼藏損傷來已久病根牢固去應難
醫師盡勸先停酒
道侶多教早罷官
案上謾鋪龍樹論
盒中虛燃決明丸
人間方藥應無益
爭得金篦試刮看

題東武丘寺六韻

香剎看非遠祇園入始深
龍蟠松矯矯玉立竹森森
怪石千僧坐靈池一劍沉
海當亭兩面山在寺中心
酒熟憑花勸詩成倩鳥吟
寄言軒冕客此地好抽簪

夜遊西武丘寺八韻

不厭西丘寺間來，即一過舟船轉雲島樓閣出煙蘿路。
入青松影門，臨白月波魚跳驚，秉燭猿覲怪鳴珂。搖曳
雙紅旆，娉婷十翠娥。容滿蟬態等十妓從遊也。香花助羅綺，鐘梵避
笙歌。領郡時將久，遊山數幾何。一年十二度，非少亦非
多。

詠懷

蘇杭自昔稱名郡，牧守當今當好官。兩地江山踴得遍，
五年風月詠將殘。幾時酒盞曾拋却，何處花枝不把看。

白髮滿頭歸得也詩情酒興漸闌珊

將殘一作來殘

重詠

日覺雙眸暗年驚兩鬢蒼
病應無處避老更不宜忙
徇俗心情少休官道理長
今秋歸去定何必重思量

百日假滿

心中久有歸田計身上都無濟世才
長告初從百日滿故鄉元約一年回
馬辭轅下頭高舉鶴出籠中翅大開
但拂衣行莫回顧的無官職趁人來

九日寄微之

眼闇頭風事事妨，遶籬新菊為誰黃。
閒遊日久心慵倦，痛飲年深肺損傷。
吳郡兩回逢九月，越州四度見重陽。
怕飛杯酒多分散，厭聽笙歌舊曲章。
蟋蟀聲寒初過雨，茱萸色淺未經霜。
去秋共數登高會，又被今年減一場。

題報恩寺

好是清涼地，都無繫絆身。
晚晴宜野寺，秋景屬閒人。
淨石堪敷坐，寒泉可濯巾。
自慙容鬢上，猶帶郡庭塵。

晚起

卧聽鼕鼕衙鼓聲起遲睡足長心情華簪脫後頭雖白
堆案拋來眼校明閒上籃輦乘興出醉回花舫信風行
明朝更濯塵纓去間道松江水最清

自思益寺次楞伽寺作

朝從思益峯遊後晚到楞伽寺歇時照水姿容雖已老
上山勦力未全衰行逢禪客多相問坐倚漁舟一自思
猶去懸車十五載休官非早亦非遲

松江亭攜樂觀漁宴宿

震澤平蕪岸松江落葉波在官常夢想為客始經過水
面排罾網船頭簇綺羅朝盤鱸紅鯉夜燭舞青娥鴈斷
知風急潮平見月多繁絲與促管不解和漁歌

宿靈巖寺上院

高高白月上青林客去僧歸獨夜深
暈血屏除唯對酒歌鐘放散只留琴
更無俗物當人眼但有泉聲洗我心
最愛曉亭東望好太湖煙水綠沉沉

酬別周從事二首

腰痛拜迎人客倦眼昏勾押簿書難辭官歸去緣衰病
莫作陶潛范蠡看

洛下田園久拋擲吳中歌酒莫留連
嵩陽雲樹伊川月
已校歸遲四五年

武丘寺路

去年重開寺路桃李
蓮荷約種二千株

自開山寺路水陸往來頻銀勒牽驕馬花船載麗人
菱荷生欲遍桃李種仍新
好住湖堤上長留一道春

齊雲樓晚望偶題十韻兼呈馮侍御周殷二協

律

樓在蘇州

潦倒宦情盡蕭條芳歲闌欲辭南國去重上北城看
復疊江山壯平鋪井邑寬人稠過楊府坊闌半長安
插霧峯頭沒穿霞日脚殘水光紅漾漾樹色綠漫漫
約畧留遺愛殷勤念舊歡病拋官職易老別友朋難
九月全無熱西風亦未寒齊雲樓北面半日凭欄干

河亭晴望

九月八日

風轉雲頭斂煙銷水面開晴虹橋影出秋鴈櫓聲來郡
靜官初罷鄉遙信未迴明朝是重九誰勸菊花杯

留別微之

干時久與本心違悟道深知前事非猶厭勞形辭郡印
那將赴伴著朝衣五千言裏教知足三百篇中勸式微
少室雲邊伊水畔比君校老合先歸

自喜

自喜天教我少緣家徒行計兩翩翩身兼妻子都三口

鶴與琴書共一船
僮僕減來無冗食
資糧算外有餘錢
攜將貯作丘中費
猶免飢寒得數年

武丘寺路宴留別諸妓

銀泥裙映錦障泥
畫舸停桡馬簇蹄
清管曲終鸚鵡語
紅旗影動駃騠

蒲撥切

鶻

河干切
舊中馬

嘶

漸消醉色朱顏淺
欲語

離情翠黛低
莫忘使君吟咏處
女墳湖北虎丘西

駃騠一本

作潑汗

江上對酒二首

酒助疎頑性琴資緩慢情有慵將送老無智可勞生忽
忽忘機坐偃偃任運行家鄉安處是那獨在神京
久貯滄浪意初辭桎梏身昏昏常帶酒默默不謗人坐
穩便箕踞眠多愛欠伸客來存禮數始着白綸巾

望亭驛酬別周判官

何事出長洲連宵飲不休醒應難作別歡漸少於愁燈
火穿村市笙歌上驛樓何言五十里已不屬蘇州

見小姪龜兒咏燈詩并臘娘製衣因寄行簡

卷二十四
已知臘子能裁服復報龜兒解咏燈巧婦才人常薄命
莫教男女苦多能

酒筵上答張居士

但要前程減無妨外相同雖過酒肆上不離道場中絃
管聲非實花鈿色是空何人知此義唯有淨名翁

鸚鵡

隴西鸚鵡到江東養得經年甯漸紅常恐思歸先剪翅
每因餒食漸開籠人憐巧語情雖重鳥憶高飛意不同

應似朱門歌舞妓深藏牢閉後房中

聽琵琶妓彈略略

腕軟撥頭輕新教略略成四絃千遍語一曲萬重情
法向師邊得能從意上生莫欺江外手別是一家聲

寫新詩寄微之偶題卷後

寫了吟看滿卷愁淺紅牋紙小銀鈎未容寄與微之去
已被人傳到越州

寶曆二年八月三十日夜夢後作

卷二十四
塵纓忽解誠堪喜世網重來未可知莫忘全吳館中夢
嶺南泥雨步行時

與夢得同登棲靈塔

半月悠悠在廣陵何樓何塔不同登共憐筋力猶堪在
上到棲靈第九層

夢蘇州水閣寄馮侍御

揚州驛裏夢蘇州夢到花橋水閣頭覺後不知馮侍御
此中昨夜共誰遊


喜罷郡

五年兩郡亦堪嗟
偷出遊山走看花
自此先陰為已有
從前日月屬官家
樽前免被催迎使
枕上休閒報坐衙
睡到午時歡到夜
回看官職是泥沙

答次休上人

來篇云門有餘霞千萬首何方一句乞間人

姓白使君無麗句
名休座主有新文
禪心不合生分別
莫愛餘霞嫌碧雲



白氏長慶集卷二十四

欽定四庫全書

集部

白氏長慶集卷二十五

六

詳校官監察御史臣查瑩

檢討臣何思鈞覆勘

總校官知縣臣繆琪

校對官庶吉士臣吳裕德

謄錄監生臣湯師錫

欽定四庫全書

白氏長慶集卷二十五

唐白居易撰

律詩

凡一百首

感悟妄緣題如上人壁

自從為駭童直至作衰翁
所好隨年異為忙終日弄
沙成佛塔鏘玉謁王宮
彼此皆兒戲須臾即色空
有營非了義無著是真宗
兼恐勤修道猶應在妄中

思子臺有感二首

凡題思子臺者皆罪江充予
觀禍胎不獨在此偶以二絕

句辨
之

曾家機上閒投杼尹氏園中見掇蜂但以恩情生隙罅
何人不解作江充

閣生魑魅蠹生蟲何異讒生疑阻中但使武皇心似燭
江充不敢作江充

賦得邊城角

邊角兩三枝霜天隴上兒望鄉相並立向月一時吹戰

馬頭皆舉征人手盡垂鳴鳴三奏罷城上展旌旗

憶洛中所居

忽憶東都宅春來事宛然雪銷行徑裏水上卧房前
厭綠栽黃竹嫌紅種白蓮醉教鸞送酒閒遣鶴看船
幸是林園主慙為食祿牽宦情薄似紙鄉思急如弦
豈合姑蘇守歸休更待年

想歸田園

戀他朝市求何事想取丘園樂此身千首惡詩吟過日

一壺好酒醉消春歸鄉年亦非全老罷郡家仍未苦貧
快活不知如我者人間能有幾多人

琴茶

兀兀寄形羣動內陶陶任性一生閒自拋官後春多醉
不讀書來老更閒琴裏知閒唯綠水茶中故舊是蒙山
窮通行止長相伴誰道吾今無往還

贈楚州郭使君

淮水東南第一州山圍雉堞月當樓黃金印綬懸腰底

白雪歌詩落筆頭
笑看兒童騎竹馬
醉攜賓客上仙舟
當家美事堆身上
何啻林宗與細侯

和郭使君題枸杞

山陽太守政嚴明
吏靜人安無犬驚
不知靈藥根成狗
怪得時聞吠夜聲

初到洛陽閒遊

漢庭重少身宜退
洛下閒居迹可逃
趁伴入朝應老醜
尋春放醉尚粗豪
詩攜綵紙新裝卷
酒典緋花舊賜袍

曾在東方千騎上至今躩蹠馬頭高

醉贈劉二十八使君

為我引杯添酒飲與君把筋擊盤歌詩稱國手徒為爾
命壓人頭不奈何舉眼風光長寂寞滿朝官職獨蹉跎
亦知合被才名折二十三年折太多

太湖石

煙翠三秋色波濤萬古痕削成青玉片截斷碧雲根風
氣通巖穴苔文護洞門三峯具體小應是華山孫

過敷水

垂鞭欲渡羅敷水處分鳴騶且緩驅秦氏雙蛾久冥冥
蘇臺五馬尚踟躕村童店女仰頭笑今日使君真是愚

南院

林院無情緒經春不一開楊花飛作穗榆莢落成堆壯
氣從中減流年逐後催只應如過客病去老迎來

閒詠

步月憐清景眠松愛綠陰早年詩思苦晚歲道情深夜

學禪多坐秋牽興暫吟悠然兩事外無處更留心

初授秘監拜賜金紫閒吟小酌偶寫所懷

紫袍新秘監白首舊書生鬢雪人間壽腰金世上榮子
孫無可念產業不能營酒引眼前興詩留身後名閒傾
三數酌醉詠十餘聲便是羲皇代先從心太平

新昌閒居招楊郎中兄弟

紗巾角枕病眠翁忙少閒多誰與同但有雙松當砌下
更無一事到心中金章紫綬看如夢皂蓋朱輪別似空

暑月貧家何所有客來唯贈北窓風

祕省後廳

槐花雨潤新秋地桐葉風翻欲夜天
盡日後廳無一事
白頭老監枕書眠

松齋偶興

置心思慮外滅跡是非間
約俸為生計隨官換往還耳
煩聞曉角眼醒見秋山
賴此松簷下朝回半日間

和楊郎中賀楊僕射致仕後楊侍郎門生合宴

席工作

業重關西繼大名恩深闕下遂高情祥鱣降伴趨庭鯉
賀燕飛和出谷鷺范蠡舟中無子弟疎家席上欠門生
可憐玉樹連桃李從古無如此會榮

松下琴贈客

松寂風初定琴清夜欲闌偶因羣動息試撥一聲看寡
鶴當薇怨秋泉應指寒慙君此傾聽本不為君彈

秋齋

晨起秋齋冷蕭條稱病容清風兩牕竹白露一庭松阮
籍謀身拙嵇康向事慵生涯別有處浩氣在心曾

塗山寺獨遊

野徑行無伴僧房宿有期塗山來去熟唯是馬蹄知

登觀音臺望城

百千家似圍棋局十二街如種菜畦遙認微微入朝火
一條星宿五門西

登靈應臺北望

臨高始見人寰小對遠方知色界空回首却歸朝市去
一稊米落太倉中

酬裴相公題興化小池見招長句

為愛小塘招散客不嫌老監與新詩山公倒載無妨學
范蠡扁舟未要追蓬斷偶飄桃李徑鷗鷺驚誤拂鳳凰池
敢辭課拙誚高韻一勺爭禁萬頃陂

閒行

五十年來思慮熟忙人應未勝閒人林園傲逸真成貴

衣食單疎不是貧，專掌圖書無過地。遍尋山水自由身，
儻年七十猶强健。尚得閒行十五春。

閒出

兀兀出門何處去，新昌街晚樹陰斜。馬蹄知意緣行熟，
不向楊家即庾家。

與僧智如夜話

懶鈍尤知命，幽棲漸得朋。門閒無謁客，室靜有禪僧。爐
向初冬火，籠停半夜燈。憂勞緣智巧，自喜百無能。

憶廬山舊隱及洛下新居

形骸僂俛班行內，骨肉勾留俸祿中。
無奈攀緣隨手長，亦知恩愛到頭空。
草堂久閉廬山下，竹院新拋洛水東。
自是未能歸去得，世間誰要白鬚翁。

晚寒

急景流如箭，淒風利似刀。
暝催雞翅斂，寒束樹枝高。
縮水濃和酒，加絛厚絮袍。
可憐冬計畢，煖卧醉陶陶。

偶眠

放杯書案上枕臂火爐前老愛尋思事慵多取次眠妻
教卸烏帽婢與展青氈便是屏風樣何勞畫古賢

華城西北雉堞最高崔相公首創樓臺錢左丞

繼種花果合為勝境題在雅篇歲暮獨遊悵

然成詠

時華州未
除刺史

高居稱君子瀟灑四無隣丞相棟梁久使君桃李新凝
情看麗句駐步想清塵況是寒天客樓空無主人

奉使塗中戲贈張常侍

早風吹土滿長衢驛騎星軺盡疾驅共笑籃舁亦稱使
日馳一驛向東都

有小白馬乘馭多時奉使東行至稠桑驛溘然
而斃足可驚傷不能忘情題二十韻

能驟復能馳翩翩白馬兒毛寒一團雪鬣薄萬條絲皂
蓋春行日驪駒曉促時雙旌前獨步五馬內偏騎芳草
承蹄葉垂楊拂頂枝跨將迎好客惜不換妖姬慢鞚遊
蕭寺間驅醉習池睡來乘作夢興發倚成詩鞭為馴難

下鞍緣穩不離北，歸還共到東。使亦相隨，赭白何曾變。
玄黃豈得知嘶風覺聲急，蹋雪怪行遲。昨夜猶芻秣，今
朝尚繫維。卧槽應不起，顧主遂長辭。塵滅駸駸迹，霜留
皎皎姿。度關形未改，過隙影難追。念倍燕求駿，情深項
別離。銀收鈎臆帶，金卸絡頭羈。何處埋奇骨，誰家覓弊
帷。稠桑驛門外，吟罷涕雙垂。

題噴玉泉

泉在壽安山下高
百餘尺直瀉潭中

泉噴聲如玉，潭澄色似空。練垂青嶂上，珠寫綠盆中。溜

滴三秋雨寒生六月風何時此岩下來作濯纓翁

酬皇甫賓客

閒官兼慢使著處易停輪況欲逢新歲仍初見故人冒
寒尋到洛待煖始歸秦亦擬同攜手城東略看春

種白蓮

吳中白藕洛中栽莫戀江南花懶開萬里攜歸爾知否
紅蕉朱槿不將來

答蘇庶子

偶作關東使重陪洛下遊病來從斷酒老去可禁愁
歎曲偏青眼蹉跎各白頭蓬山間氣味依約似龍樓

答尉遲少監水閣重宴

人情依舊歲華新今日重招往日賓
雞黍重回千里駕林園闢換四年春
水軒半寫琉璃鏡草岸斜鋪翡翠茵
閒道經營費心力忍教成後屬他人

時主人欲賣林亭

和劉郎中傷鄂姬

不獨君嗟我亦嗟西風北雪殺南花
不知月夜魂歸處

金史四庫全書
鸚鵡洲頭第幾家

姬鄂人也

卷二十五

贈東鄰王十三

攜手池邊月開襟竹下風驅愁知酒力破睡見茶功居處東西接年顏老少同能來為伴否伊上作漁翁

早春同劉郎中寄宣武令狐相公

梁園不到一年強遙想清吟對綠觴更有何人能飲酌新添幾卷好篇章馬頭拂柳時回轡豹尾穿花暫亞槍誰引相公開口笑不逢白監與劉郎

寄太原李相公

聞道北都今一變政和軍樂萬人安綺羅二八圍賓榻
組練三千夾將壇蟬鬢應誇丞相少貂裘不覺太原寒
世間大有虛榮貴百歲無君一日歡

雪中寄令狐相公兼呈夢得

兔園春雪梁王會想對金壘詠玉塵今日相如身在此
不知客右坐何人

出使在途所騎馬死改乘肩輿將歸長安偶詠

旅懷寄太原李相公

驛路崎嶇況雪寒欲登藍輦一長歎風光不見桃花騎
塵土空留杏葉鞍喪乘獨歸殊不易脫驂相贈豈為難
并州好馬應無數不怕旌旄試覓看

有雙鶴留在洛中忽見劉郎中依然鳴顧劉因
為鶴歎二篇寄子予以二絕句答之

辭鄉遠隔華亭水逐我來棲緱嶺雲慙愧稻梁長不飽
未曾迴眼向雞羣

荒草院中池水畔
銜恩不去又經春
見君驚喜雙回顧
應為吟聲似主人

宿竇使君莊水亭

使君何在在江東
池柳初黃杏欲紅
有興即來閒便宿
不知誰是主人翁

龍門下作

龍門澗下濯塵纓
擬作閒人過此生
筋力不將諸處用
登山臨水詠詩行

姚侍御見過戲贈

晚起春寒慵裹頭
客來池上偶同遊
東臺御史多提舉
莫按金章繫布裘

履道春居

微雨洒園林
新晴好一尋
低風洗池面
斜日拆花心
暝助嵐陰重
春添水色深
不如陶省事
猶抱有絃琴

題洛中第宅

水木誰家宅
門高占地寬
懸魚挂青甃
行馬護朱欄
春

榭龍煙煖秋庭鏤月寒松膠粘琥珀筠粉撲琅玕試問
池臺主多為將相官終身不曾到唯展宅圖看

寄殷協律

多叙江南舊遊

五歲優游同過日一朝消散似浮雲琴詩酒伴皆拋我
雪月花時最憶君幾度聽雞歌白日亦曾騎馬詠紅裙

予在杭州日有歌云聽唱黃雞與白日又有詩云著紅騎馬是何人吳娘暮雨蕭蕭曲自

別江南更不聞

江南吳二娘曲詞云暮雨蕭蕭郎不歸

洛下諸客就宅相送偶題西亭

几榻臨池坐軒車冒雪過交親致杯酒僮僕解笙歌流
歲行將晚浮榮得幾多林泉應問我不住意如何

答林泉

好住舊林泉回頭一悵然漸知吾潦倒深愧爾留連欲
作棲雲計須營種黍錢更容求一郡不得亦歸田

將發洛中枉令狐相公手札兼辱二篇寵行以
長句答之

尺素忽驚來梓澤雙金不惜送蓬山八行落泊飛雲雨

五字鎗鏃動珮環玉韻乍聽堪醒酒銀鈎細讀當披顏
收藏便作終身寶何啻三年懷袖間

臨都驛答夢得六言二首

楊子津頭月下臨都驛裏燈前昨日老於前日去年春
似今年

謝守歸為祕監馮公老作郎官前事不須問着新詩且
更吟看

喜錢左丞再除華州以詩伸賀

左轄輟中臺門東委上才彤襜經宿到絳帳及春開民
望懇難奪天心慈易回那知不隔歲重借冠恂來

和錢華州題少華清光絕句

高情雅韻三峯守主領清光管白雲自笑亦曾為刺史
蘇州肥膩不如君

送陝府王大夫

金馬門前回劍佩鐵牛城下擁旌旗他時萬一為交代
留取甘棠三兩枝

代迎春花招劉郎中

幸與松筠相近栽，不隨桃李一時開。
杏園豈敢妨君去，未有花時且看來。

翫迎春花贈楊郎中

金英翠萼帶春寒，黃色花中有幾般。
憑君語向遊人道，莫作蔓菁花眼看。

閨出

身外無羈束，心中少是非。
被花留便住，逢酒醉方歸。

事行時少官曹入日稀春寒遊正好穩馬薄綿衣

座中贈盧判官

把酒承花花落頻花香酒味相和春莫言不是江南會
虛白亭中舊主人

曲江有感

曲江西岸又春風萬樹花前一老翁過酒逢花還且醉
若論惆悵事何窮

杏園花下贈劉郎中

怪君把酒偏惆悵曾是貞元花下人自別花來多少事
東風二十四回春

花前有感兼呈崔相公劉郎中

落花如雪鬢如霜醉把花看益自傷少日為名多檢束
長年無興可顛狂四時輪轉春常少百刻支分夜苦長
何事同生壬子歲老於崔相及劉郎

余與崔劉年
同獨早衰白

微之就拜尚書居易續除刑部因書賀意兼詠

離懷

我為憲部入南宮君作尚書鎮浙東老去一時成白首
別來七度換春風簪纓假合虛名在筋力銷磨實事空
遠地官高親故少些些談笑與誰同

喜與韋左丞同入南省因叙舊以贈之

早年同遇陶鈞主利鈍精粗共在鎔

憲宗朝與韋同入翰林

金劍

淬來長透匣鉛刀磨盡不成鋒差肩北省慙非據接武
南宮幸再容跛鼈雖遲騏驥疾何妨中路亦相逢

伊州

老去將何散老愁
新教小玉唱伊州
亦應不得多年聽
未教成時已白頭

早朝

鼓動出新昌
雞鳴赴建章
翩翩穩鞍馬
楚楚健衣裳
宮漏傳殘夜
城陰送早涼
月堤槐露氣
風燭樺煙香
雙闕龍相對
千官鴈一行
漢庭方尚少
慙歎鬢如霜

答裴相公乞鶴

警露聲音好
冲天相貌殊
終宜向遼廓
不稱在泥塗
白

首勞為伴朱門幸見呼不知疎野性解愛鳳池無

晚從省歸

朝回北闕值清晨晚出南宮送暮春
入去丞郎非散秩歸來詩酒是閒人
猶思泉石多成夢尚歎簪裾未離身
終是不如山下去心頭眼底兩無塵

北牕間坐

虛牕兩叢竹靜室一爐香
門外紅塵合城中白日忙
無煩尋道士不要學仙方
自有延年術心閑歲月長

酬嚴給事

聞玉藥花下有遊仙絕句

羸女偷乘鳳去時
洞中潛歇弄瓊枝
不緣啼鳥春饒舌
青瑣仙郎可得知

京路

西來為看秦山雪
東去緣尋洛苑春
來去騰騰兩京路
閒行除我更無人

華州西

每逢人靜慵多歇
不計程行困即眠
上得籃輿未能去

春風敷水店門前

從陝至東京

從陝至東京山低路漸平
風光四百里車馬十三程
花共垂鞭看杯多並轡傾
笙歌與談笑隨分自將行

送春

銀花鑿落從君勸金屑琵琶
為我彈不獨送春兼送老
更嘗一酌更聽看

宿杜曲花下

覓得花千樹，攜來酒一壺。
懶歸兼擬宿，未醉豈勞扶。
但惜春將晚，寧愁日漸晡。
籃輿為卧舍，漆盞盧谷切是行廚。
斑竹盛茶櫃，紅泥罨飯爐。
眼前無所闕，身外更何須。
小面琵琶婢，蒼頭觴葉奴。
從君飽富貴，曾作此遊無。

逢舊

久別偶相逢，俱疑似夢中。
即今歡樂事，放盞又成空。

繡婦歎

連枝花樣繡，羅襦本擬新年餉。
小姑自覺逢春饒，悵望

誰能每日趁工夫針頭不解愁眉結線縷難穿淚臉珠
雖凭繡牀都不繡同牀繡伴得知無

春詞

低花樹映小粧樓春入眉心兩點愁斜倚欄干背鸚鵡
思量何事不回頭

恨詞

翠黛眉低斂紅珠淚閣銷曾來恨人意不省似今朝

山石榴花十二韻

曄曄復煌煌花中無比方艷天宜小院條短稱低廊本
是山頭物今為砌下芳千叢相向背萬朵互低昂照灼
連朱檻玲瓏映粉牆風來添意態日出助晶光漸綻
脂萼猶含琴軫房離披亂剪綵斑駁未勻粧絳焰燈千
炷紅裙妓一行此時逢國色何處覓天香恐合栽金闕
思將獻玉皇好差青鳥使封作百花王

送敏中歸幽寧幕

六十衰翁兒女悲傍人應笑爾應知弟兄垂老相逢日

杯酒臨歡欲散時前路加飧須努力今宵盡醉莫推辭
司徒知我難為別直過秋歸未訝遲

宴散

小宴追涼散平橋步月回笙歌歸院落燈火下樓臺殘
暑蟬催盡新秋鴈帶來將何迎睡興臨卧舉殘杯

人定

人定月朧明香消枕簟清翠屏遮燭影紅袖下簾聲坐
久吟方罷眠初夢未成誰家教鸚鵡故語相驚

池上

嫋嫋涼風動淒淒寒露零
蘭衰花始白荷破葉猶青
獨立棲沙鶴雙飛照水螢
若為寥落境仍值酒初醒

池窓

池晚蓮芳謝
牕秋竹意深
更無人作伴
唯對一張琴

花酒

香醅鋪杯切淺酌浮如蟻
雲鬢新梳薄似蟬
為報洛城花

酒道莫辭送老二三年

題崔常侍濟源莊

谷口誰家住雲扃鑠竹泉主人何處去蘿薜換貂蟬籍
在金閨內班排玉宸前誠知憶山水歸得是何年

認春戲呈馮少尹李郎中陳主簿

認得春風先到處西園南面水東頭柳初變後條猶重
花未開時枝已稠閣助醉歡尋綠酒潛添睡興著紅樓
知君未別陽和意直待春深始擬遊

魏堤有懷

魏王堤下水聲似使君灘惆悵回頭聽躊躇立馬看蕩
風波眼急翻雪浪心寒憶得瞿塘事重吟行路難

柘枝詞

柳閣長廊合花深小院開蒼頭鋪錦褥皓腕捧銀杯繡
帽珠稠綴香衫袖窄裁將軍拄毬杖看按柘枝來

代夢得吟

後來變化三分貴同輩凋零大半無世上爭先從盡汝
人間鬪在不如吾竿頭已到應難久局勢雖遲未必輸

不見山苗與林葉迎春先綠亦先枯

寄答周協律

來詩多叙
蘇州舊遊

故人叙舊寄新篇惆悵江南到眼前
閣想樓臺萬餘里
不聞歌吹一周年
橋頭誰更看新月
池畔猶應泊舊船
最憶後亭杯酒散
紅屏風掩綠窓眠

白氏長慶集卷二十五